



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8

Rahul Gandhi-i Covid-19 inyakyim shidak beshitsü ayongzük

July 19 tashi UK mokdanga ayutsü : PM Johnson

VOL. XVIII NO. 242 (ADOK 242) DIMAPUR RASEMNÜ (WEDNESDAY) AAMI (JUNE) 16, 2021 ₹ 5.00

Nagaland sorkari GHC, Kohima Bench nem COVID-19 indang osang magütsür

Kohima, June 15, 2021 (TYO): May 24, 2021 nung Gauhati High Court, Kohima Bench-i Nagaland state sorkar dang COVID-19 atema maparen inyakba osang agütsütsü tetuyuba agütsü saka tanü tashi sorkari telangzüba kecha magütsür. May 5 aser 24 anogotem GHC, Kohima Bench-i iba indang ken o angadanga sülen sorkar dang isolation centre shimtsü, sample test asüba mapa ulushitsü, COVID-19 tendangba ajak angati kümdaktsütsü, vaccine agütsüba inyakyim tuluba inyaksü, health facility nung nübo indang osang agütsütsü aser mang aremba

atema sen aika agiba ajemtsü tetuyubatem agüja liasü. State sorkari tetuyuba ajak inyaksü aser June 10 nü iba ken o angadangtsü atema GHC Kohima Bench Justice Songkhupchung Serto aser Justice S. Hukato Swu nati metetdakja liasü. Ajisüaka, tanü tashi state sorkari okadak affidavit magütsü lir. COVID-19 wara ajanga GHC Kohima Bench inyaksangshi nunga tetsükdaktsü ajurua lir aser division bench ji hopta nung khen dang amener. Iba jagi June 10, 2021 nü angadangtsü atema anogo shimaka, tang tashi ano iba ken o mangadang lir ta osang angazüker.

Dimapur nung plastic jang meyokteper ayokba video ka prokshi



Mongulbarnü Dimapur district ketdangsurtemi M/s Arihant Industries, Naharbari shibangtsüba angur. (Dimapur, June 15)

Dimapur, June 15, 2021 (TYO): Dimapur nung jang tajung den plastic jang meyokteper ayoker ta Mongulbarnü video ka prokshiba ngua nisungtem kanga aoksaogo aser iba kuli tejanga metettsü yongyar. Ajisüaka, laboratory nung tendanga meputet tashibo plastic jang ta meshitettsü, ta ketdangsur kati ashi. Iba video ya East Dimapur, Naharbari nung agiba lir aser video nungji jang tapu balala meyoktepa aliba sayua lir.

M/s Arihant Industries, Naharbari nung jang meyokteper aser Tripal Five Rice ta ajaba bosta nung enoker ayoker ta video nung shia lir. Tanü Naharbari nung alir Naga nung kati plastic jang ta ajitetba sülen M/s Arihant Industries nung oa video nung jang indang kulitem sayu. Iba osang angashiba sülen Naharbari Village Council aser lanurtemi bushisüngdangtsü atema tesem tonga ao, ta Naharbari Village, Chairperson Tokheli Kikon-i osangbener dang

ashi. Parnok tesem nungji lia District administration, Food & Civil Supply department ketdangsurtem aser police aru aser parnoki jang indang kulitem bendenogo, ta laisa ashi. "Onoki jang indang kulitem bendena tendangtsü atema bener yokogo. Iba indang osang mangu tashibo plastic aser chichiba jang'ar kecha meshitettsü aser osang mangu tashi iba dokan shibangja atatsü" ta District administration ketdangsur katia ashi.

Arishi küm 18 ser temapurtem vaccine agitsü tezübaba kümtsür

New Delhi, June 15, 2021 (Agencies): Arishi küm 18 ser temapurtemi pei anasa aliba vaccination centre-i oa CoWIN digital platform nung tenüng zülüoktsü akok ta Union Health Ministry-i metetdaktsüogo. COVID-19 vaccine aginürtemi jelia online nung mesüra appointment magi nunga kecha masü, ta Centre-i ashi. Vaccine agitsü nungnangba tebilemstü ya alima kübok tesem ajalen ajurur aser iba tebilemstü ya lokti jenjang nung kanga junga angatettsü merangtsüla ta taoba hopta Centre sorkari ashi. Centre-i state aser UT sorkartem den 'COVID-19 Vaccine Communication Strategy' indang lemsatepdang iba olen ashi.

Uttar Pradesh nung tantsür kati vaccination team nungi jenbuttsü atema drum ka tesülen atsükba aser ano Madhya Pradesh nung yimdaklirtemi vaccination team amakba sülen Centre-i 'COVID-19 Vaccine Communication Strategy' lemsatep. Iba jagi Centre-i arishi küm 18 ser temapur atema 'walk-in vaccinations' inyakyim tenzüokogo. India nütsüng yongsük nung arishi küm 18-44 tsüngda alir timtiba lir aser parnok nem vaccine agütsüba ajanga COVID-19 tenokdangbatem salatettsü aser rongsenkettsüng den shishilembaba maparen tenzüokshitettsü ta mongintemi ashir.

COVID-19 Nagaland: Taneptsü angur 82.81% kümogo

Kohima, June 15, 2021 (TYO): Nagaland nung anogo terbuba atongtepa COVID-19 puteter dang nungibo taneptsü angur timba liasü. Mongulbarnü Covid puteta alir nisung 322 taneptsü angur aser 101 dak putet. Tanü puteterem züngsema nisung ajak agi 23,854 kümogo. "Tanü nisung 101 dak COVID-19 aliba putet. Parnokji Dimapur nung 31, Kohima nung 25, Mokokchung nung 12, Tuensang nung 10, Longleng nung 7, Mon o Zunheboto nung trokrok (6), Kiphire nung 2 aser Peren o Wokha nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i metetdaktsü. "Mongulbarnü COVID-19 agi shiranger nisung 322

taneptsü angur. Parnokji Dimapur nung 205, Kohima nung 57, Wokha nung 17, Tuensang nung 15, Mokokchung o Phek nung terer (10) aser Longleng nung 8 lir. Parnok züngsema taneptsü angur ajak agi nisung 19,753 kümogo" ta pai ashi. Iba ajanga Nagaland nung COVID-19 nungi taneptsü angur 82.81% kümogo aser tang nisung 2,972 anepaludar, ta paisa ashi. Tanü COVID-19 puteta alir nisung 3 asü. Parnokji Dimapur nung ana aser Wokha nung ka liasü. Tanü asürtem züngsema Nagaland nung COVID-19 puteta alir nisung 459 süogo saka parnok 14 bo tanga tashidak ajanga asü, ta Dr Kikon-isa metetdaktsü. Tang tashi nung COVID-19 alitsü ako ta temolung melemi

bilemba sample 2,09,989 tendangogo. RT-PCR ajanga 94,443, TrueNat ajanga 58,899 aser Rapid Antigen Test ajanga 56,647 tendang, ta paisa ashi. "Nagaland nung nisung 3,02,391 nem COVID-19 vaccine indang dose 3,57,199 agütsüogo" ta State Immunization Officer Dr Ritu Thurr-ia ashi. Vaccine agirtemji frontline workers 59,536, healthcare workers 15,712, arishi küm 45 ser temapur 1,32,094 aser arishi küm 18 nungi 44 tsüngda alir 95,049 lir, ta paisa ashi. "Vaccine agirtem rongnungi nisung 54,808-i dose anaprong agiogo. Parnokji frontline workers 28,185, healthcare workers 10,305 aser arishi küm 45 ser temapur 16,318 lir," ta Dr Thurr-isa ashi.

Israel Embassy, Delhi nung bomb pokdaktsür noksa sayu

New Delhi, June 15, 2021 (Agencies): New Delhi nung Israel Embassy kima bomb ka pokdaktsüba sülen ita pungu shi süia arur Mongulbarnü National Investigation Agency (NIA)-i iba tatalokba nung shilem agirtem ta temolung melemi bilemer nisung ana indang noksa sayuogo. NIA-isa iba nisung ana shia indang maitsü jangjasü aser aputsü ateam yariteper nem Rs 10 lakh senpet agütsütsü ta sangoktsüogo. Bomb apokba anogo tena ya iba tesem anasa senzüba angu. NIA-isa tena indang noksa aser video den email IDs aser

phone numbers metetdaktsüogo. January 29, 2021 nü Israel Embassy anasa bomb ka apok aser iba mapang Vijay Chowk nung Beating Retreat ceremony tagidak liasü. Beating Retreat ceremony nung President Ram Nath Kovind, Prime Minister Narendra Modi aser tongti ketdangsurtem aden. February 2, 2021 nungi NIA-i iba bomb apokba bushisüngdanga arur. Bomb apokdang iba anasa anema aliba gari asem indang aina jaksatsü aser bomb apokba anogo ya India o Israel tsüngda tesentaktep yanglur küm 29 ajungba anogo liasü.


Aor tebur sü tabentsü tim mesüi agiba atema tatok meshiogo

Dimapur, June 15, 2021 (TYO): Assam kübok Jorhat district nung alir Munmuni Payeng-i Aor tebur sü tabentsü ka tim mesüi agir May 30, 2021 nü social media nung sayuba atema tatok meshiogo. Iba noksa anguba sülen Ao Kaketshir Mungdang (AKM)-i bushisüngdangtsü tenzüok aser parnoki la dang tatok meshitsü atema shidi ka zülua liasü.


Iba atema Munmuni-i AKM dang telangzüba agütsüba shidi nung ali sü tabentsü indang sobaliba aser inyakyim memetet liasü aser Ao Naga sobaliba mezüngmeshitsü tebilemba kecha maliasü ta ashi. Lai iba noksa social media nung sayuba atema kanga sasar aser Ao Naga nungger ajak tatok meshir ta Munmuni-isa shidi nung metetdaktsü.

"Alima nung lisopur sobaliba aser inyakyim sama aoer anungji asenoki asen maitsü kümzüka ayutsü atema sobaliba aser inyakyim beshitsüla. Asenoki nübortem dang asen sobaliba metetdaktsütsüba kanga tongtipang aser tarutsü nung iba ama ken o tem majurutsü imlar" ta AKM Information & Publicity Secretary, Onenpong-i sangdong ka nung metetdaktsüogo.


Covid-19 tashidak nokdangtsü atema senso shia teinyaktsü asem :



Tangar alidak teti teni tebang nembanga mask temerük agiang;



Tangar den tsüktepa tenokdak aser temen;



Teti sapon agi teka metsükang.

Dimapur nung makamaiter nem teyari agütsü tenzükogo



June 15, 2021 nü Dimapur DC, Rajesh Soundararajan-i Dimapur Districk küpok sub-District-tem nem terayi agütsü atema tenzüktsüba yangi noksa nung angur.

Dimapur, Aami/June 15 (TYO): Dimapur district nung lockdown ajanga timtem ajurua aliba aayanger aser labourer nem jang-o-tzü teyari agütsüba sentong ka Deputy Commissioner, Dimapur, Rajesh Soundararajan ajanga June 15, 2021 nü tenzükja liasü.

Ketdangsürtemi ashiba agi, district nung tesem ajunga nungi iba teyari agütsütsü atema kibong 7,000 zülutena lir. Iba teyari agütsüba package (talep) nungya jang, dal, kholar, mustard oil, shini, metsü, süngojok, temang shidokba aser süoshi ashiba sapon, malasa

packet, onion, süngmok aser chilli powder dena lir. Holy Cross School Auditorium, Dimapur nung item oset renemba aser alemba nung Dimapur Ao Baptist Arogo (DABA), Muslim Council aser Red Cross nungi volunteer temi yaritepa liasü.

Deputy Commissioner, Mon ajanga totuyuba talila kar agütsür

Dimapur, Aami/June 15 (TYO): Home Department ajanga June 9, 2021 nü totuyuba agütsüba den bendenloksema Mon nung June 18, 2021 tashi amshitsü atema Deputy Commissioner aser Chairman, District Task Force, Mon, Thavaseelan K, IAS ajanga totuyuba talila kar agütsüo.

ayokba dokan tem Hombar, Bodhbar aser Hokulbar anogotem lapoktsü melatsü. 4. Tekulem sentep aser lokti adenshiba maneni thinena atatsü. Ajisüaka tekülem kidang sarasademba senden aser fellowship agütsü melatsü, kong nisung 20 dak tema mesenteptsüla.

7. COVID-19 mozü agütsüba mapang IT teyari atema district nung Common service Centres (CSCs) tem lapoktsü melatsü. 8. Kisü-jensü tasen melar aser bendanglen nungi meyipa shilanger aser senzüsemponger atema April 29, 2021 nü SOP yanglushir sangdongba nung mela aliba ama kisü-jensür tasen arutsü melatsü.

1. No Mask- No Movement aser No Mask- No Entry yimya ya ajaki kanga junga amshitsüla.
2. Mela aliba dokan aser business establishment tem anepdang 6:00 ako nungi nikongdang 2:00 ako tashi lapoktsü melatsü.
3. Stationary, mobile phone aser computer oset, hardware oset ayokba dokantem, gari yangluba tesem aser gari oset

5. Schools/Colleges indang Administrative offices nung officers /Staff aliba core group tem rongdak nungdak aser tongtipang maparen atema melatsü.
6. DTF nungi jelia temelaba agiba sülen nija business office tem nung officers / Staff indang core group bo rongdak nungdak aser tongtipang maparen atema melatsü.

9. Taxi tem densema Light Motor Vehicles (LMVs) ya Odd-Even yimya nung jajatsü melatsü. Taxi driver temi negative Covid test report agütsütsüla. Bus services, two-wheeler taxi services aser tetsüing ana aketba talongtsü tesülen nisung amenba memelai alitsü.

Security Forces temi state nung nisung aika apu



Dimapur, Aami/June 15 (TYO): Security Forces temi June 03, 2021 nü general area Paramedical Colony, Kohima nung nisung ter den truck pezü nung Veneer sheets bener lia apu.

bushisüngdangtsü atema agütsüo, ta osang ka ajanga ashi. Security Forces temi Police den lungjemer operation ka June 11, 2021 nü agiba mapang general area, Burma Camp, Dimapur nungi NSCN (U) züngsem ka pua liasü.

Ano maneni Security Forces temi police den lungjemer general area Khehokhu, Dimapur nung June 13, 2021 nü operation ka agiba mapang NSCN (N-NK) züngsem ka pua liasü.

Osang tejangja kar nung ajemdaker Security Forces temi nisung ter apu aser Veneer sheets tons 96 shi bena aliba truck pezü pua liasü, koba saru magütsüi ozüing alema bener aruba liasü, aser ano parnok ket nungi sen 50,000 ngutet.

Iba operation agiba mapang sepaitemi NSCN (U) züngsem ket nungi sen 35,000 shi jenjang Brown Sugar boxes 10 nguteta liasü. Iba ken o maneni bushisüngdangtsü asoshi pua alisang den pa ket nungi ngutetba oset ya East Police Station, Dimapur nung agütsüo, ta ashi.

Osang tejangja ka nung ajemdaker sepaitemi general area Khehokhu, Dimapur nungi NSCN (N-NK) züngsem ka ya apu aser tashiyim agi pua bener oa aliba truck driver ka 6th Mile Petrol Pump, Dimapur nungi kumzükja liasü. Pua alisang ya asüngdangyatsü atema Chumukedima Police Station, Dimapur nung agütsüo, ta osang ajangasa ashi.

Healthcare nung inyaker dang tali temolung agütsütsü ajungshir

Dimapur, Aami/June 15 (TYO): COVID-19 cases tali akumba aser iba tashidak wara tajungtiba nung ketdangsütsü mechi Principal Director, Health & Family Welfare, Dr. Neikhrilie Khimiao ajanga health units/establishment balala nung healthcare worker dang totuyuba kar agütsü liasü. **Aser item tetuyuba yamai alitsü:**

1. Pei mapa nung temolung agütsü aser shidak inyaksüla.
2. Osettsüset metokmeperi nungi kumzüktsü aser timtem majurui supply shidak agütsütetsü atema mapang shidak nung nungdakba mozü aser osettsüset nungdakba aliba osang agütsütsüla.
3. Temelaba makai pei mapa inyakba tesem yutsür maotsüla. Health ground nung Medical Board ajanga temelaba magütsü tashi leave kecha magizüktsü.
4. Influenza Like Illness (ILI)/ Severe Acute Respiratory Illness (SARI) aser telok kar dak tashidak kasa putetba amala ajunga metetdaksütsüla.

Iba totuyuba nung manidaker/aibelener kar danga lira, tapet temerenshi agütsütsü, ta ashi. Health unit balala kübok healthcare nung inyaker ajak dang nisung kari danga tsünglanglen shia aliba ama inyakra, Epidemic Act 1987 & (Amendment) 2020 agi melaba ama pei Controlling Officer nem osang agütsütsü totuyuba agütsü:

1. Pei jurisdiction kübok alirtem health tsütsü nungdakba tem reprangtsü aser Health Centre staff tem par mapa tajungtiba nung takok ngua inyaksü atema ketdangsütsü, totuyuba agütsütsü, len sayutsü aser yaritsüla.
2. Health centre aser healthcare services inyakyim dak sendakba nung nüburttem temolung masübatem jangjateptsüla aser peritsütsüla.
3. Staff tem temelaba makai mapai maruba osang Principal Director, Health & Family Welfare nem sangoktsütsüla.

Health unit balala kübok healthcare nung inyaker ajak dang nisung kari danga tsünglanglen shia aliba ama inyakra, Epidemic Act 1987 & (Amendment) 2020 agi melaba ama pei Controlling Officer nem osang agütsütsü totuyuba agütsü:

1. Pei inyakba health center mesüra danga nung pa/la

MLA T. Yangseo Sangtam-i Pungro semdang

Dimapur, Aami/June 15 (TYO): MLA aser District Planning & Development Board, Kiphire indang Chairman T. Yangseo Sangtam-i June 15, 2021 nü Pungro, Kiphire semdang aser GA Rest House, Pungro nung administration, medical team, frontline worker, lokti balala lenir aser NGO tem den senden ka mena liasü.

ya agütsü ajungshia liasü. Paise senden nung adenertem dang vaccine indang nüburttem nem shisatsü agütsütsü ajungshia liasü. Iba tesem nung lockdown ajanga timtem ajurua aliba aayanger nem MLA Yangseo-i PPE oset, mask aser jang bag 100 agütsü liasü. Iba senden amenba sülen pai anir Pungro nungi Mimi, Likimro, Amikiuro, Mutenkhong, Mimi, Khongjiri, Longkhimvong, Tsurevong, Khonsa, Salomi aser Luthur sendaktepba lenmang yanglushiba semdanga liasü.

Iba senden nung jembiba mapang MLA Yangseo-i nüburttem dang COVID-19 mozü indang osang tiazi nung mamangtsü ayongzük aser mozü

Mokokchung District Task Force COVID-19 Vaccine

SPECIAL VACCINATION DRIVE

For 45 years & above

And PWDs (18 years & above)

Wednesday 16 th June 2021 Time: 9 AM - 12 Noon	Wednesday 16 th June 2021 Time: 1 PM - 4 PM	Friday 18 th June 2021 Time: 9 AM - 12 noon
<ul style="list-style-type: none"> • Marepkong Ward • Yimyu Ward • Arkong Ward • Salangtem Ward • Dilong Ward • Sungkomen Ward • Mokokchung Village • Chuchuyimpang Village 	<ul style="list-style-type: none"> • Artang Ward • Mongsenbai Ward • Aongza Ward • Sangtemla Ward • Alempang Ward • Tongdentzuyong Ward • Mkg Compound 	<ul style="list-style-type: none"> • Kumlong Ward • Kichutip Ward • Lijaba Lijen Ward & Majakong Ward • Penli Ward • Alongmen Ward

Contact your Ward/Village authorities and ASHAs/Health Workers for more information.

For any queries, contact **8131 929284**

Assam-i ali atsünga agiba anema NE state tem longjemtsüla

Shillong, June 15, 2021 (Agencies): Assam sorkari Meghalaya ali atsünga agir ta Hynniewtrep Integrated Territorial Organization (HITO)-i tai tongloksüogo.

Parnokisa Northeast state tem longjemer Assam-i ali atsünga agiba atema Centre sorkar dang nung teyari meshitsü ayongzükogo.

HITO-i Meghalaya Chief Minister Conrad Sangma dang

shidi ka züluba nung Assam-i ali atsünga agiba atema state sorkari mapa inyaksü ayongzükogo.

Assam sorkari state ana tsünga nangzüktepa aliba toksür asaa ali atsünga agir, ta HITO-isa ashi.

"Assam-i Nagaland aser Meghalaya dena Northeast state tem indang ali atsünga agiba manener. Anungji Chief Minister Conrad-i tanga state tem den jembitepba sülen state ajak

külemi Centre sorkar dang nung teyari meshitsü ayongzüköer" ta parnokisa metetdaksü.

Northeast nung regional party temi parnok indang manifesto nungbo arrtsü onük enoksema liasü saka mejembir, ta HITO-isa ashi.

Tawa tu Assam nungi lennir kari West Jaintia Hills kübok Khatkasla yim nung border police outpost yangluba semdanga liasü.

Assam sorkari SOPs tasen latettsü; June 22 tashi curfew atsülanger

Guwahati, June 15, 2021 (Agencies): Assam sorkari Mongulbarnü June 22, 2021 tashi state nung curfew atsülangtsü telemtetba agiogo.

Guwahati nung curfew ghonda ka salatsüogo aser June 22 nikongdang 2:00 ako nungi anepdang 5:00 ako tashi curfew alitsü.

Guwahati nung dokantem, shishilembadak, restaurants, dhabas, sorkar aser nija office ajak nikongdang 1:00 ako tashi

dang lapoktsü.

"District 8 aser Guwahati dak alia state ajungalen nikongdang 1:00 ako nungi anepdang 5:00 ako tashi nisung senzüsönbongba noktanger" ta Health Minister Keshab Mahanta-i ashi.

Covid putetertem aser shiranger ajema akümba ajanga Chirang, Udalguri, West Karbi Anglong, Bongaigaon, Majuli, Dima Hasao, South Salmara aser Charaideo

district 8 nung talenba aika salaogo.

Item district 8 nung nikongdang 5:00 ako nungi anepdang 5:00 ako tashi curfew alitsü.

Ajisüaka, June 22 tashi inter-district senzüsönbongba noktangtsü.

Assam nung Covid-19 vaccine dose anaprong agiba sorkar mapa inyaker ajak Hombar nungi office-i aotsü tenzükogo.

Mizoram CM-i Myanmar refugee tem yaritsü nangzük

Aizawl, June 15, 2021 (Agencies): Young Mizo Association (YMA)-i mepishiba ama Mizoram Chief Minister Zoramthanga-i Myanmar nunger refugee tem yaritsü nangzükogo.

Young Mizo Association (YMA) indang 86 buba benjungmong tenung nung ketdangpurtemi Mizoram Chief Minister den ajurutepa Myanmar refugee tem atema temepishiba agütsü.

Iba mapang YMA ketdangpurtemi Chief Minister dang refugee tem agizüktsü aser yaritsü atema mepishia liasü.

Mizoram nung NGO tulutiba

Young Mizo Association (YMA)-i nungdabapur tem yarir, shisaliok ajungketer, lipoküm kümzüka ayu aser lokti ajungtsü atema inyaker. Iba anogomong nung YMA züngsem ajak dangi tepela salem abener" ta CM Zoramthanga-i Twitter nung metetdaksü.

Kümshia June 15 nung YMA Day amonger. Iba ya regional public holiday ka lir aser 1935 küm YMA tentetba nüngtem nung monga arur.

Young Mizo Association (YMA) ya Mizo nunger non-profit, secular, nongovernmental organization tulutiba lir.

YMA ya Welsh Christian

missionary temi Mizo kin sobaliba kümzüka ayutsü nükjidong nung tentettsüba lir.

May 14, 1977 nung Mizoram sorkar tsüngdang Indian Societies Registration Act (XXI of 1860) kübok YMA register asü.

Iba NGO ya Aizawl nung amenokba central committee (Central YMA) lenisüba kübok sub-headquarters 5, groups 47 aser branches 805 lir. YMA kongsangtem ya Mizoram nung dang masü saka Assam, Manipur, Meghalaya, Nagaland aser Tripura nunga lir.

Tang YMA züngsem 404722 lir aser iba nung tebur 247467 aser tetsür 157255 lir.

Navy-i Meghalaya nakmati atudak tasümang 2 nguogo

Shillong, June 15, 2021 (Agencies): East Jaintia Hills kübok Sutnga nung nakmati atudak nisung samar bushiba nung Indian Navy nungi diver temi mang ana ngutetogo.

Iba osang ya Meghalaya Chief Minister Conrad Sangma-i

metetdaksü. Mang anaji nakmati atudak angu ta osang angazükogo ta CM Conrad Sangma-i ashi.

"Asenoki chichiba osang metettsü atadi. Navy aser tanga rescue team temi mapa inyakdar" ta paisa ashi.

May 31, 2021 nü East Jaintia

Hills kübok Sutnga nung nakmati atur nisung pungu nakmati atudak ka nung anenbanga liasü.

Iba lendong atalokba sülen telok balalai search & rescue operation mapa inyaka arur. Nisung pungu rongnung Assam nungi ana dena lir.



Assam nung arishi küm 8 tain tanur tetsür Jahnavi Kiran Kalita-i la tasoba anogo benjung memongi CM Relief Fund nem tenla agütsüogo. La ya Assam kübok Bajali district nungi lir aser Anundoram Barooah Academy nung class 2 nung azünger. Jahnavi Kiran Kalita-i la arishi küm 8 ajungba tenung nung Pathsala Civil Hospital gate nung süngdong ka atem. Jahnavi-i la teyi Drisha Kiran Kalita den külemi tasoba anogo benjung amongtsü atema amshitsüba sen CM Relief Fund nem tenla agütsütsü shisateta liasü.

MULUNG NEN O



" Ni' kanga junga raraogo, ni' alizüing tonga asemogo aser ni' junga amangogo."

- 2 Timoti 4:7.

Ozü temeim kinungbo, tsürabur aser lenir tajung, Padmashree **WB.M.PIYONGTEMJEN JAMIR** shiranga aliba mapang aser pa June 12, 2021 anogo nung iba lima nungi pilar, onok timtem aser tejashi nung alidang, onok dang kanga meima yariteper ajak dang onoki kanga pelaba metetdaksür. Nenok teyaritem agi onok mulung kanga anisüngzüka moatsüogo.

Onoki nenok nisung shia tsüngdong arua pelaba meshitettsü, ajisüaka Tulusang Tsüngremi nenok kija aser kibong ajak talubosa moajang ta onoki sarasademtsür.

Talisa onoki item dang ya pelaba shisemer :

1. Shri. R.N.Ravi, Hon'ble Governor of Nagaland.
2. Shri. Metsubo Jamir, Hon'ble Minister, R.D.
3. District Administration, Dimapur
4. Ao Baptist Arogo Padumpukhuri.
5. Ongpangkong Senso Telongjem Dimapur.
6. Ao Senso Telongjem Padumpukhuri.
7. Jan Jati Shiksha Samiti Dimapur
8. Longsa Senso Telongjem Dimapur.

Nenok ajak dang kanga pelar.

-Temeim kinungtsü, chirnur, semchirtem aser anük-apangtem.

Gauhati High Court-i Assam sorkar nem tetuyuba agütsü

Guwahati, June 15, 2021 (Agencies): Gauhati High Court-i Assam sorkar dang health care worker tem kümzüka ayutsü atema kechi mapasa inyaka lir ta asüngdangogo.

June 1, 2021 nü Hojai district kübok Udali Model Hospital nung Covid-19 agi shiranger kinungertemi doctor, nurse aser medical staff tem dak teka sangshiba sülen HC-i sorkar nem tetuyuba agütsü.

Assam sorkari mozü ki telung nung prangpong-injang mesüra nisung yirutsütsüsa oset kecha bener marudaksütsüla ta Chief Justice Sudhanshu Dhulia aser

Manas Ranjan Pathak nati akümba bench-i ashi.

Assam nung hospital aser medical college ajak nung doctor aser health worker dak teka sangshiba anema ozüing yangluba notice ayutsüla ta okadakisa metetdaksü.

Supreme Court advocate, Sneha Kalita-i shidi ka züluba nung ajemdaker Gauhati High Court-i sorkar nem iba tetuyuba agütsü.

HC-isa Assam sorkar dang hopta ana tsünga Hojai district nung lendong atalokba osang agütsütsü mapang lazüktsü aser iba atema kechi mapasa inyaka lir ta asüngdangogo.

Manipur nung tanur dak tashiyim mapa inyaker ka apu

Imphal, June 15, 2021 (Agencies): Manipur kübok Moreh nung tanur tetsür ka dak tshiyim agi shi nung medemba atema police-i nisung ka puogo.

Arishi küm 33 tain tebur jagi June 10, 2021 nü Moreh nung aliba Public Health Centre nung arishi küm 8 tain tanur tetsür ka dak

tashiyim agi shi nung medem ta tai tongloksü lir.

Iba nisungji Mission Veng nung alir Mangminlal Touthang ta jangjaogo.

Iba tatalokba atema ken o benokba sülen pa jenshia aruba sülen Moreh nungi kilometre 30 shi pilar aliba Bongmol yim nung apu.

Assam police-i Dibrugarh nung taila doctor ka apu

Dibrugarh, June 15, 2021 (Agencies): Assam police-i Dibrugarh nung tea estate ka nung doctor jilu benshir ka apu.

Iba nisung ya Eyaqub Ali ta jangjaogo aser pai Chirang district kübok Kajalgaon Civil Hospital nung inyaker Dr. Eyaqub Ali Ahmed ama jilu benshia aru.

Estate nung doctor ka ama inyaka aru.

Taoba mapang pai Greenwood tea estate (Dibrugarh) aser Borholla tea estate (Jorhat) nunga medical officer ama inyaka liasü.

Dr. Eyaqub Ali Ahmed-i FIR ka agütsüba nung ajemdaker Chabua Police-i iba nisung anema ken o benok.



TIR YIMYIM

YIMOBILEM (EDITORIAL)

DIMAPUR RASEMNÜ, AAMI (JUNE) 16, 2021

Ain aketba temeim teka nungdaker

Covid tashidak wara agi asenok amokbanger alinungji, anogo shia iba tongpang dak aketba tebilemstütem lemsateptsübajiang tongtibang akümer. Aji oda, joko tang yabo state, District aser Sub-Division-tem nung Covid tongpang nung tir aser walunirtem telok , Task Force purtembo anogo shia nikongdang anogo piyong tongpang nung atalokba indang osang agitepa ano asüng atema raratsü sentong yanglutsü asoshi 'War room' nung senden amentsüla. Idangjiang, nübortem tia metettsü aser mozü kidang inyaker aser shirangertem jenjanga asadangtetsü. Tashidak wara den rarar asünungji, nisung shinga jenbua mali, anungji nisung aikati pei kümdang-kümdanga aliba den mozü ki tashi nung nungdak reprangteta tenla agütsüba angur. Aji oda, tashimaita aliyonga, ano asenok daka tajunga aika lirji, Covid tongpang nung wajak nung nokdakertem (Frontliners) timmedemdaktsütsü asoshi kija-kibong, lokti tentet aser arogotemi kari chiyongtsü, kari sen, kari oset ta mask nungi oxygen cylinder aser generator tashi tenla agütsüba angur. Iba ama tongpang nungjibo tenokdaknüsüka aser taküm aoa mesasai raranüsüka bilemer. Iba ama tongpang yabo asen tsüraburtemia meraradang, tanü asen putu nung asenoki longjemer rarar aser asenoki takok angutsü. Tsükchir tasen den mezüng tongpang nokdaker asünungji, aiben asenok tsübuteper, ratamatar, nungdak agi meperir aser koba tama aser koba tesü inyaksüar aiben telemtetba shitak magitetter. Idangji aiben asenok rongnung temulung melemttep adoker, jashiteper aser tezüdangteper, ajisüaka tongpangji tongpang, tongpang nungi shinga jena aotsü makok aser tongpang nung atsüker raratsü makok, kechia sang sang, tongpang nung ajener aser atsükshishirjibo medemertemi khaseta endoker. Iba tangatetba aser temulungtetba nung tongpang nung walunirtemi anir sepaitem ajak nokdaker aser tanügba nübortema kodangangka tajaba arutsü ta renemer atar. Iba jagi tongpangji akoker. Joko, asenok ajak Covid tongpang tiyong nung nokdaka lir aser tang dang nungi tsükchir telok tesashiba kati asenok makyonga arutsü arr osang sangokja lir. Aji oda, Covid yipru ka süir tang ka taitdak lir aser asenoki mitsa junga meyanglura, ano tasembuba yiprujisa tesashiba aittsü amai tekümdangtsü osang arua lir. Iba tebilemstü jagi asenok amuia moi taküm ajak bendanga agüja inyaksüba mapangji tang ya lir. Taküm ajak bendanga agüja inyaksü tetetzü, nisung ajak pei taküm aser kibong taküm alitsü asoshi mapa ka mesüra kabo inyaker, ajisüka tang Covid mokdang aliba agi kecha meinyaktet takoksa tulu ajurudagi. Ajisüaka, taküm kümzüka alitsü mechi rongsen nung takoksa ajuruba arema tangar alidaki mao asen kija amongbaji bendanga agüja tongpang nung nokdaker asütsü. Yimsüsür aser lenirtem asoshia nübortem ajemajema kidang mongdakja alidang, tashidak menatsü metsübui tongpang nung nokdaker walunirtem nungdak agüja anepalubaji taküm bendanga agüja inyakba mapa lir. Ajakji yutsür, talisa aser tongtibangsa, mozü kidang inyakeritem timtem arema PPE agir Covid mozü kidang shirangertem dak kongshia Blood Pressure, Sugar aser oxygen level tendanga tapet mozü agüja yaribaji pei taküm agi tendanga bendanga agüja inyakba mapaji asütsü. Joko, tangbo asenok tanga nungdak ajak periogo ta bilemer saka tang nungdakbaji mozü kidang shirangertem yaritsü asoshi temeim teka nungdaker. Nungdak oset ajak peria aliyonga aser oxygen-a agir magima bendena aliyonga, item amshia temeim agi shirangertem dak kongshia anepaluba temeim teka melira Covid tongpangbo makoktsü. Tongpang nung ya nok nü kisüng ajungba agi masü saka nok nü amsangji tasü tait, pei lima meimba aser pei nübortem kümzüksü asoshi pei taküm samatsüa mapayui mitsa maitsüi nokdakba walunir (Frontliners) asütsü nungdaker. Aji oda, nok nü nung ain aliba agi masü saka nisungi nokji ain keta amshitetba agi nokinketer akümer. Iba kasaji tanü asenok ket nung Covid den raratsü asoshi kechi bendena aka, item dakji ain keta ali ama bilemstüsa, asenoki item jagi nisungtem mulungjang nung tetsüba aliba samadaktsütettsüla aser taneptsü agütsütettsüla. Atangji, shiranger ajakbo manepstütsüa akok saka manepyonga tasü mang yur anepalurtem dang 'Kanga pelar' ta shitettsüsa aser mesasatsüsa asenoki asenok dak aliba temeim agi ain kümdaktsür shirangertem anepalutettsüla. Iba atemaji dang mozü ki yanglu aser mozü kidang inyaker aser mozü ki bushir.

OLEMSABANG

KULISÜBA :

~ Mrs. Sentikümla, Dimapur

Okila : Aor tamangertem tanela asentenshitsu asoshi khuret bena sarasademtsü Tsüngremi jembibatem kar lemsatepner. Kecha meimlaba mapang ka 11th April 2008 nung yamai jembu "Yimtak aser Town nung aliba Arogo anaprongla arakzua taküm aliba Arogo asütsü sarasademang" Ni tenüng jateta Tsüngrem tenzüka wadang nung aliba taküm ka masü, mangdang shiner kata masü ano Aor tamang jenjang ni kecha memetet, saka kodaser iba amala Tsüngremer tejembiba aru ta kü sasa kanga bushidanga aser koma asütsü ta sarasadema anogo ana süidaktsü. Tasemnübuba nung sarasademang ta ashirji sarasadem tenzüksü ta ser anogo shia ghonda ka sarasadema aru, tongtipang onükji Yimtak aser Town nung aliba Arogo anaprongla ta asüba ya, ozü yimer asü, Ao Arogotem asü, Naga lima Arogotem atema benteta metetdajang aji asünung dang parnok dang kuli sütettsü. Aji oda küm asem süia sarasadema aruaka shirnok atema ashiba telangzüba kecha mali nung koda asütsü ta bilem, saka item kümtem tsüngda nung Tsüngremi danga tejembiba aser tajungshiba balala agi kü tanela saksalemdakja liasü. Maneni sarasadema arudang 30th sept'2011 nung "Aortem Asentenshi akatsüla, kipok sema ao nung parnok ajak pei mapai omar shinga majurur" Iba sülen Aor tamangertem tanela asentenshitsu atema Tsüngremi tejembiba balala agütsü nung yamaji sarasadema arudagi. Tsüngrem tenzükertema karbo ajurua lemsatepogo, osang kakat nunga tayongzüka agütsüogo, saka ano maneni kuli asütsü jembu nung iba sabang ajanga lemsateper.

Tsüngremi jembibatem:

Tamanger shiai nendaka sarasademra tabensaba angatettsü.

agüja alibatem shisadanga tamangertemi sarasadem onüktem yanglua agitsü ayongzüker.

11th April 2008 "yimtak aliba aser town nung aliba Arogo anaprongla arakzua taküm aliba Arogo asütsü sarasademang"

31st May 2008 "Arem atang ka nung san telok; tulu aser tila aika puoka yutsür kiburi mereprangi parnok sasa dang chiyima sayu"

30th sept'2011 "Aortem Asentenshi akatsüla, kipok sema ao nung parnok ajak pei mapai omar shinga majurur"

19th March 2013: "Tzümetsüng arutsü ashidang Tsüngrem O ashitsüla"

9th Oct'2015 "Tsüngrem aser teintet lanurtem; parnok tanela nung renemtsür tenzüka wadang balala nung yoktsüla.

31.10.2016. "Temenen yimoka aitba aridoktsü asoshi sübotsü temesüng süboba Angumtoba nem scooter agüja liaka teka kata mesalar ano tetsüng külen manem asünung scooterji start süa temenen aridoki aotsübaji meinyaktet. Ano külen nungi tetsür ka aser tebur ka temenen aridoktsü ta ser telok amenba nungi tera ajungketer temadak atoka sayu. Ya kechi tetetzü ta telok mena alirtemi jembitep, ola kati yamai ashi, "tamalenbo tanela sempet ka-a liasü, saka atsüngzüka or joko temenen den rarar mali, parnok tsüngda nung dang raratepa kazür"

17.2.2018. Sentilong aser ayir ka sayu aser ashi, "Bethesta awatsüng nung tzü nungshiba parnoki amadok"

Temeim amangbapurtem, item Tsüngremer tejembibatem ajanga asenok tanela asentenshitsu baji rongdak nungdak ta angateter. Kibok sema ao nung ajak pei mapai omar shinga majurur ta asen Tsüngremi kanga temulung machiba O ashiba ya Aor tamangertem ajaki kanga arok-aroka shisadangi. Ano Naga lima Arogotem ajak atema sarasadema aru saka ya kechiba Aor dangang ashir ta bushidangdi. Tanü asen lokti, yimten aser Arogotem tashi nung teraksa jenti atokba teraji bushidangra aseni teyanglur Tsüngrem sendokba nungi atokba ta shitettsü. Asenoki küm aika Aor asentenshi atema sarasadema arudagi aser inyakyim balala inyakdagi saka ano maneni Kibubai asen den jembir. Anungji Aor taintem aser tulurtem nungi tenzüker tilatiba nütsüng nübortem tashi pei tashi maitba aser tamakoktem nangzüka Tsüngrem anasa odi. Naga lima nung Aorji mezümpur aser lenir kin ta asenoki jembiba ama Khrista tesayuba dak ajemdaker mitkar ama asenok tanela nung saksalemdi. Tatempang putu temaitsü jenti atalokba aser temenen mapatem temai atoka makmakshishia petsaperongtepba mapang ka nung Tsüngrem ola angadanga Pa den tsüngchir süa alitsü merangdi. Iba osang azünger ajak nem Temeshi Tsüngremi tanela tangatetba agüjangma. Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Myanmar nung sepaitemi Khristan putir trokprongla chiokogo



Kengtung, Myanmar nung Khristantemi linük nung yimjung alitsü aser democracy lenirtem chioktsü atema takhangba agüja longkak aitba noksa nung angur.

June 15, 2021: Myanmar linük nung sepaitemi Arogo ka mita aoba mapang nung putir trok pua liasü, ajisüaka parnok dang asüngdangyaba sülen parnok ajak chiokogo, ta Arogoi sangdong ka ajanga metetdaksü.

Myanmar nungi sepaitemi yimsüsüba anema longkak aiterem den putirtemi tesendaktep yur inyaker, ta melung melemi putir trok apu.

June 13, 2021 anepongi 1:00 ako meta sepaitemi Chantar yim dak Assumption Arogo mita aoba mapang putir trokprongla apu. Iba Arogo ya Mandalay Archdiocese kübok lir.

June 12 ayaterm nung truck 11 nung sepaitem arua Buddhist monastery ka mita aoba sülen Assumption Arogo mita ao.

Taküm February 1 nü sepaitemi democracy lenirtem pua sepaitemi yimsüsü tenzükba sülen nungi telok aikati sepai yimsüsüba anema longkak aiter. Telok karibo prangpong amer sepaitem den rarar saka telok timbakati yimjung nung longkak aiter.

Police-i putir trokprongla ghonda 15 shi pua asüngdangyaba sülen ang

chiok.

Osangbener den jembidang parnok rongnung putir kati, June 13 anepdang 5:00 ako meta parnok police station ka atong aser police-i parnok dak tashiyim mamshi, ta metetdaksü.

"Onok Khristan putirtem, ta metetba sülen police ketdangser kati onok chioktsü tuyu. Parnoki onok dang asüngdangyaba saka onok dak teka mesangshi," ta putir, Zaw Win-i metetdaksü.

1800 küm nungi Chanthar yim dak Paris Foreign Missions Society (MEP) nungi missionary temi mission mapa inyakba ajanga Buddhist nütsüng aika aliba region nung ya tangbo Khristan nütsünga aika lir.

Putirtem apuba osang prokba sülen June 13 nü (Amongnü) Arogo temi tekülem sentong nung putirtem atema sarasademja liasü.

May 13 nüa sepaitemi Kachin State kübok Banmaw Arogo nungi putir ka pua liasü saka anogo pezünü lir chiok. April ita nunga sepaitemisa Kachin State nung Arogo aika mita ogo.

Tawa sepaitemi Kachin

State aser Kayah state na nung Tenla ki aika maakogo.

Myanmar kübok Kayah State nung sepaitemi Arogo temi amakba dang masü saka injang aser shells amshiba ajanga Khristan meyirjang aikati yimtsüngtem toktsür ajener.

May 31, 2021 nungi tenzuka Demoso aser anasa aliba yimtsüngtem nung sepaitemi Karenni People's Defense Forces anema tesashiba raradar, aser ibaji ajanga Khristantem densema yim daklirtemi yimtsüng toktsür arem nung jenoker, ta Arogo lenirtemi metetdaksü.

Sepaitem aser Karenni People's Defense Forces tsüngda rara ajanga nisung 85,000 nungi 100,000 tashi jenshiogo.

Rara ajanga jenshirtemji timbaka Kayah kübok Demoso, Hpruso aser Loikaw jilatem aser Shan state kübok Hsiseng aser Pekhön jila na nungi lir.

Karen, Kachin, Chin aser Kayah states nung sepaitem aser lisopur telok balala tsüngda rara tesashiba kümogo, aser item states ajunga ya Khristan nütsüng timba aliba regions lir.

Pastor aikati denomination nung adenba ya tongtambang ta bilemer

June 15, 2021: US nung Protestant pastor tem aikati denomination telemsa aliba aser denominations nung adenba ya kanga tongtambang, saka taruba küm 10 tsüngda denominations ya ajema akümtsü ta bilemer, ta Lifeway Research survey tasen ka ajanga bushitet.

Iba survey nung Protestant pastor 1,007-i shilem agi aser survey osang tan ita sangdong.

Protestant pastor tem shilem 78-i, denomination ka mesüra ka nung adenbaji tongtambang, ta ashi aser shilem 20-i denomination ya tongtambang masü, ta ashi.

Pastor tem shilem 77-i, Arogo nung par züngsemtemi denomination ya tongtambang ta bilemer, ta ashi.

"United States nung Protestant Arogo temi nung denomination telemsa lir aser mangatettep lir, local aser national non-denominational networks tasen aika lir aser denomination, convention mesüra conference kecha nunga madenba Arogo temi-a aika lir," ta Lifeway Research nung executive director, Scott McConnell-i metetdaksü.

Iba survey nung shilem agir pastor tem aikati denomination telemsa nung tajanzük lir, ta bilemer saka tarutsü atema arendaka bilemer.

Pastor tem shilem 63-i, taruba küm 10 tsüngda denomination nung adenba ajema akümtsüa akok ta ashi,

aser parnok rongnung shilem 19-ibo denominations nung adenba kanga ajema akümtsü ta ashi.

2010 küm agiba survey nunga pastor shilem 62-i taruba küm 10 tsüngda denomination jenjang tamajungba akümtsü, ta lemsatepa liasü.

Tawa agiba survey nung arrshi küm 18-44 tsüngdapur pastor tembo shilem 54-i dang tarutsü nung denomination jenjang tamajungba akümtsü, ta ashi.

"US nung pastor tem densema nisung aikati Protestant denominations anentsü ta jembia liasü saka matalok," ta Scott McConnell-isa metetdaksü.

ANOGO ABEN TSÜNGREM DEN

Maneni sarasademang

Sarasadem nung maneni akangakanga liang, aser idakji tenüngsang agütsüba den saksalema liang. Kolosi 4:2

Kolosi nung aliba khristantem ama alitsü Pauli tetuyuba agütsü. Kati ka khu bentepbang, kati ka dang tai toktepang, meimtepang, Khrista Oji ne dak mungdakjang (Kolosi 3:13-16). Kechisa inyakdir mulungsoa aser Yisu tenüng nung inyaktsüla ta Pai parnok dang ashi (t. 17, 23). Idangji pai parnok sasa sarasadem nung akangakanga alitsü ashi. Akangakanga tetezü tanen makai. Asenoki tanen makai inyakba jaji Tsüngremi asenok sarasadem langzüsü ta amangba sayur. Asenoki aji metet saka Tsüngremi asen mapang nung asen sarasadem melanzür. Saka asen tamangi asenok nem mapa pezü bilemtetdaksür. 1) Tsüngremi asenok tia metet kechiaser Pa ajak Metetsang. 2) Asen tia tiyong nung Tsüngrem asenok den dena lir, kechiaser Pai ajak metet. 3) Tsüngremi Pa mapang nung asenok sarasadem langzüsü. 4) Asen asoshi Tsüngremi tajungtiba telanzüba agütsüsü.

Nai langka asoshi mesüra kar asoshi maneni sarasademtsü aniadokra, idangji item onüktem ya bilemtetang: 1) Renema liang (temulung makai teküm), aser 2) Tenüng sangang. Tasen Lai ajunga nung Pauli asenok dang tenüngsang agütsüsü indang ashir. "Kecha nung temulung tatemala saka ajak nung sarasademba aser mepishiba aser tenüngsang agi nenoki meshiba Tsüngrem nem metetdaksang" (Fil. 4:6). "Teti pelaang, maneni sarasademang, kechisarena nung tenüngsang agüjang" (1 Tesa. 5:16-18). Asenoki maneni sarasademtsüla aser asenoki teti tenüngsang agütsüsüla. Tsüngremi tajung ajak aser tabensa sempet agütsür (Yakob 1:17), tang aser teti tatem makai. Ibaji asoshi asenoki tenüngsang agütsüsüla.

Oba, tangar asoshi aser ni asoshi bendanga agüja sarasademba taküm ka ni kümjang.

Carrie Underwood-i osangtajung kensep 'My Savior' DVD sayatsü



Nashville venue, Ryman Auditorium nung 'My Savior' live concert nung Carrie Underwood-i ken atandang tangokba noksa nung angur.

June 15, 2021: Osangtajung kentener, Carrie Underwood-i taruba ita la indang osangtajung kensep 'My Savior' indang concert DVD sayatsü; iba kenten sentong ya Nashville venue, Ryman Auditorium nung tangoka liasü.

'My Savior: Live From the Ryman' ta ajaba DVD July 23 nü sayatsü aser iba DVD nungi la indang kensep nungi "Amazing Grace", "How Great Thou Art" ken den lai CeCe Winans aser Needtobreathe telok nungi Bear Rinehart nung den külemi atenba ken densema lir.

Taküm Underwood-i My Savior kensep sayaba mapang nung lai, iba project ya lai mapang talangka nungi inyaktsü bilema liasü; la kentenba wadang nung tiyongtsüji Khristan tamang kümdaktsüsü la nükjidong liasü, ta lemsatepa liasü.

"Ni mapang talangka nungi record sünüa aliba kensepji ibai lir, aser taküm indang tajungshiba kentem adokba atema ni kanga pelar," ta lai ashi.

My Savior kensep madokdang Underwood-i

Khristmas kensep 'My Gift' adoka liasü. Lai country kensep adokba sülen küm asem jungogo aser maneni taküm country kensep ka adoktsüa akok, saka tang tashi nungbo official sangdong mali.

'My Savior' kensep indang concert DVD alitsü atema June 14 nungi mangatsü akok, iba sülen July 23 nungi ken kar PBS den tanga channel aika nung sayatsü.

'My Savior: Live From the Ryman' DVD nung aliba ken 13 ji item ya lir:

1. "Jesus Loves Me (instrumental)"
2. "Because He Lives"
3. "Blessed Assurance"
4. "Nothing But the Blood of Jesus"
5. "Just as I Am"
6. "How I Love Jesus"
7. "Softly and Tenderly"
8. "Great Is Thy Faithfulness (feat. CeCe Winans)"
9. "I Surrender All"
10. "Victory in Jesus"
11. "How Great Thou Art"
12. "The Old Rugged Cross"
13. "Amazing Grace/Something in the Water"


OLONG PAITEP # 5846

1				2					3	
						4		5		
6			7							
					8		9			10
11										
12		13						14		
		15								
						16				
	17									
					18					

TIPIEN		LANGTSÜNGLEN	
1. Yakob tetsü - (6)		2. _ _ _ gki - (3)	
4. Mezüng nisung - (4)		3. Telungpur telok ka - (2)	
6. Tasen lai kaket ka - (5)		5. Tsüngremi mezüng poktetdaksüba - (5)	
9. Au lanu - (2)		7. Tia - (4)	
12. Tejen lai 21 buba - (11)		8. Yakob-er jabaso ka - (5)	
15. Tekolak tembar - (2)		10. Abraham tebutü - (4)	
16. Zütsüra anepsang - (5)		11. Rebeka kinungpu - (4)	
17. Kain tenu - (4)		13. Esau tenu - (5)	
18. Hana-er jabaso - (6)		14. Tzünglu tilala aru - (4)	
		16. Jafet tebu - (3)	
		17. Teka agi kongshi - (2)	

OLONG PAITEP # 5845 TELANGZÜBA

TIPIEN :	LANGTSÜNGLEN :
2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,	1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.



ALOKBA KIBUR DANGI TANÜNGBA OLA :

Alokba : O Kibur, nai mezüngbuba nisung yanglu, aji sür tetsür yanglu, Nisung O tetsür na longjemdaksü aser soyapokya Alima molu lisem, ama Anüng petinu ama rendaksü, aser item dangji meimchir ta aja, putusa putu melentepa arudang remso mapang ajuru, yimchiyim jung tensa liasü, azükaru konang nungsang tia nung libalirua aruogo, mejatem talidak pelenshidang nemzür ama ozü Lima meimchir longsolongpena yimdong sünga nungzütep, ne dang külemba sükii mesümi na külemnertem nungtenba, tasüdak ki kimai mesemi atenshia asüko lemsatep, Christmas aser New year benjung, ano Alima benjungtem yamato longsotepba anogotemto kongi oatokaka? lanurtem kaket rijui aodang raratena longsotepba to kechi aküm? Yimdong tazüng anüngdang terotu nunga tsüngtangpi akonger kisetshirurua kimai maluteter, Corona o onok na yamai tsükchitrper liasü na? Oh! Kibuba ya kechi tensa, onok kechi akümstü, kongi aotsü? Naisa bilemdangangma no ta ne chir Alokba tanüngba ola yokeraniiii!

Lilir: Kilang Ajem, Indisen, Dimapur.

TANÜBO NAI LANGZÜANG

Q. Koba küm International Accreditation Forum ngutet?
 A.1990 B.1991 C.1992 D.1993

===== (Taruba adok nung onoki langzüsü)
YASHI ADOK TELANGZÜBA : Aimee Lou Wood

AO OSHI ANGAZÜKDAK:

TANÜ ANGAZÜKTSÜBA OJANG



Kakma

(v) long mesüra temang ka, ana küma piladaksü (split of boulder like object into two)

* Onoki long tuluka jambol amshia **kakma**.

Kakpok

(v) kangshia lapok (open forcefully)

* Aueri kibur malidang kishi **kakpok**.

NAI-A YA METETTER MA?

MAY 2021' NUNG SAYABA KEN TASEN KAR:

- Joey Trap - "MORENA FREESTYLE"
- Lil Darkie - "FIGHT!"
- Maluma - "Vamo' a Gozárnola"
- Reo Cragun - "Late to the Party" ft. Problem, Mike & Keys
- Reo Cragun - "Not the Internet"
- Texas - "Moonstar"
- DC the Don - "Ski (Remix)"
- Don Toliver - "What You Need"
- Flight Facilities - "Lights Up" ft. Channel Tres
- Kevin Morby - "Dumcane"
- Maisie Peters - "Funeral" ft. James Bay
- Rostam - "From the Back of a Cab"
- Wavves - "Help Is on the Way"
- Ashe - "Me Without You"
- Dizzy - "Sunflower, Are You There?" ft. Kevin Garrett
- Doss - "On Your Mind"
- Kelsy Karter - "Mars"
- Jake Hill - "state of mind"
- Joan - "so good"
- Lil Tecca - "Never Left"
- Little Simz - "Woman" ft. Cleo Sol
- Matilda Mann - "My Point of You"

(Maneni asüng adok nung...)

SUDOKU # 5887

TELANGZÜBA # 5886

2		1	6	4			8	9	5	1	7	2	6	3	8	4	
			7	2		6	5	4	2	7	6	3	4	8	5	9	1
4	5	6			3	2			3	4	8	9	5	1	6	2	7
	2	4				1	6	9	1	9	2	6	8	4	7	5	3
	9	5	3	6	4	7	8		7	6	5	2	1	3	8	4	9
	6		1			3		5	4	8	3	5	7	9	2	1	6
				1			2		8	1	7	4	6	5	9	3	2
	8	7			9			3	5	2	9	1	3	7	4	6	8
				3	6	8			6	3	4	8	9	2	1	7	5

OJANG LUTEP # 5431

- EPI :
- ANDG :
- NGNUI :
- MBTAU :
- BAALI :
- GAI :
- LOTEK :
- NGNU :
- DESAMA :
- JEMMEBI :

OJANG LUTEP TELANGZÜBA # 5430

**PEII MERANGA BENDENBA TEMOATSÜ ASER RONGSEN
 MAGITETTSÜSA KÜMRA KODA TESASATSÜ**

TAN HOPTA ATEMA - KOMA SÜLA ?

Q. Private mozü kidang Covid agi shiranger anepaluba jenjang (treatment charges) ya government-i sensaker lenji tera oa latettsü nunga koma süla ?



Patiala nung CM Capt Amarinder Singh'er ki anasa ETT TET Qualified Unemployed Teachers Union-i Punjab sorka anema longkak aitba mapang police temi parnok nokdangtsü merangba noksa nung angur.

Shiv Sena-i Ram temple inakyim ajak ochishia inyaksü mepeshia

New Delhi, Aami/June 15 (Agencies): Maharashtra nung sorkar kümteter aliba party Shiv Sena-i, Ato Kilonser Narendra Modi dang, Ayodhya nung Ram Temple yangluba nung ochi mashi ken o kecha madoktsü atema pai jentang tapet agitsü mepeshia metetdaktüsügo. Sena indang mouthpiece Saamana yimozülü nung Mongolbarnü, temple yangluba nung inyakyim ajak odangtetsüsa aser ochi inyaksüla, kechiyong iba ya linük meraket lir ta shia lir. Taoba Samajwadi Party Mp Tej Narayan Pandey aser Aam Aadmi Party Parliament züngsem Sanjay Singh nati ashiba agi, March 18 nü nisung anati sen crore 2 agi ayokba ali ka temple yangluba achaayangba teloki minute 10 sülen sen crore 18.5 agi alizük

ta ashi. Temple yangluba achaayangba teloki Hombarnü, ali ya shishilembadak jentang dang nungi dalangba agi alizükogo ta ashiba den ali aliba dak sendakba nung ken o bushitsügdangtsü akhangba magizük aser ochi mashi ken o kecha sendaka mali ta shiogo. Shiv Sena lenir Sanjay Raut-i Hombarnü ashiba agi, kuli balala agütsüba ya taoksatsüka. Pai, Rashtriya Swayamsevak Sangh (RSS) tekolakba Mohan Bhagwat, Trust aser Uttar Pradesh chief minister Yogi Adityanath dang iba ken o jangjashitsütsü khangogo. "Ram temple yangluba aser temple atema ali alizükba ya ochishia inyaksüla. Ram sülen anidakertem tamang yirurutsütsüsa kecha

mataloktsü ta bilema aliba mapang ali alizükba ken o temai adokogo. Iba ken o ya shidak süang tai süang takaratiba nung jangjashitsütsüla. Ram temple nung inyakyim ya linük meraket lir. Ochi mashi ken o kar danga sendaka lira Ato Kilonser Modi aser RSS lenir Bhagwat nati ken o achaayangtsüla," ta yimozülü nung shia lir. Kasa mapang nung Bharatiya Janata Party lenir Atul Bhatkalkar-i, Hindu nunger yirutsüba atema sena aitsüogo. Pai, Shiv Sena-i trust nem sen crore 1 tenla agütsür aliba meyipa meshitsüla ta ashi. "Nüburtemi tamang agi temple atema tenla agütsüogo aser item sentem ya ochishia amshidar. Shiv Sena-i tamang makara parnoki sen crore 1 agütsür aliba meyipa meshitsüla," ta pai ashi.

Adhikari-i anir MLA temi West Bengal Angh den ajurutep

Kolkata, Aami/June 15 (Agencies): West Bengal Assembly nung Opposition lenir aser BJP lenir Suwendu Adhikari-i anir BJP MLA 50-i June 14 nü Angh Jagdeep Dhankhar den Raj Bhavan nung ajurutepogo. State nung eletion tembangba sülen mangatettep balala adokba dak sendakba nung MLA temi tezüluba nung takhangba ka agütsüogo.

Tagore-i yamai ashi; 'where mind is without fear & head is held high', ta Dhankhar-i osangbenertem dang ashi.

State nung temzüng ozüing dak sendakba tatalokbatem azüokba dak sendakba nung Dhankhar-ia, Chief Minister Mamata Banerjee kanga mejungi aija arudar. Kasa mapang nung TMC-ia, Dhankhar ajanga Centre-i constitutional post ka mashiymi amshir, ta shia arudar.

West Bengal nung temzüng ozüing tensa tamajungba küma aoba anemba temaitsü MLA temi Raj Bhavan-i tetsüing agi jajaa ao. Senden nung Suwendu-i, Angh dang anti-defection law kanga junga benoktsü atema mepeshiogo. BJP ticket amer election akokba sülen Mukul Roy tanaben Trinamool Congress-i meyipa orr aliba mapang ka nung iba ken o benokogo.

TMC-isa, BJP MLA tanungbatem senden nung madenba indang ashishiogo. Tawa tembangba election nung BJP-i menden 77 kokteta liasü. TMC MP Sukhendu Sekhar Roy-i, Angh den senden amenba mapang BJP MLA tem ajak kechiba maden iba indang bushitsügdangtsüla ta ashi.

Dhankhar-i MLA tem dang pai ken o jangjaa aliba metetaktüsüba den takok tashi tebilemtsütem bentetsü asoshi inyaksü nangzükogo. "Ni teka mejemteper nüburtem ajak dang mepeshir; Bengal nung azütokshi maginer. Iba lima nung azütokshi asoshi kecha jentang mali. Rabindranath

Suwendu-i taoba hopta Delhi nung Ato Kilonser Narendra Modi den ajurutepogo aser West Bengal dak sendakba ken o balala benoka sensaksemogo. Tatalokba balala atalokyonga aoba mapang Mukul Roy-i küm asemshi BJP nung shilem agiba sülen ajungbena TMC-i meyipa aru.



Kolkata nung Covid wara pokteter aliba ajanga state mokdanga yur aliba mapang restaurant aser bar tem nung kentener aser musician temi parnok mapa tenzükshitsütsü khanga longkak aitba noksa nung angur.

Chirag Paswan-i LJP MP 5 party nungi mintok

New Delhi, Aami/June 15 (Agencies): Chirag Paswan-i Mongolbarnü tebu tanobo Pashupati Kumar Paras densema MP pongu party nungi mintokogo. Iba janga Lok Janshakti Party (LJP) tekolak menden atema tetoktepba tatembang ka dangi maru ta sayur. Lenir pongu mintoktsü asoshi telemtetba ya Bongolbarnü party national executive senden nung agia liasü. "National Executive committee-i, Pashupati Kumar Paras MP, Beena Devi MP, Chaudhary Mehboob Ali Kaiser MP, Chandan Singh MP aser

Prince Raj MP Lok Janshakti Party nungi mintoktsü atema telemtetba agiogo. LJP National tir Chirag Paswan nem taruba assembly election nung party tenüing nungi telemtetba ajak agitsü atema temelaba agütsür," ta party sangdong ka ajanga metetdaktüsü. Mongolbarnüsa Pashupati Kumar Paras-i aniba teloki party tir menden nungi Paswan atsüingtoka liasü. National executive senden mamen tsüingda Chirag Paswan-i Twitter ajanga, "party aser kibong melemsatsü asoshi merangdangogo saka takok mongutet," ta ashi.

"Kübu aser ozü kibongi tenzükba party melemdangtsü merangdangogo saka takok mongutet. Party ya tetsü ka ama lir aser tetsü ka kodanga mashioktsütsüla. Deomcracy nung nüburtemji ajak dang tongtibangtiba lir. Party dak tamang akar ajak danga kanga pelar," ta Paswan-i tweet asü. Paswan-isa, tebu tanobu Paras dangi pai March ita züluba shiti ka lemsatepa liasü. Shiti nung tebu tanobu ken o aika nung mepelaba shisema lir, kong pa party tir asütsü shimba atema tebu tanobu mepelaba densema lir.

Rahul Gandhi-i Covid-19 inyakyim shidak beshitsü ayongzük

New Delhi, Aami/June 15 (Agencies): Congress lenir Rahul Gandhi-i Mongolbarnü nüburtem dang Covid-19 dak sendakba yimayimpong shidak beshitsü aser takaratiba nung vaccine agitsü mepeshia metetdaktüsügo.

ta pai ashi.

Delhi densema state balala nung tenokdangba agütsür aliba tem salatsütyonga aoba sülen pai iba temepeshiba metetdaktüsügo. Linük yimtiba nung Hombarnü nungi mall, shishilembadak aser restaurants tem lapoktsü temelaba agütsüogo.

Gandhi-i Twitter ajanga, "linük mokdanga aliba salatsütyonga odar saka coronavirus bo mesamai asenok den lir. Iba amala tensa ka nung ajak kümzükba alitsü atema tetuyuba agütsür aliba sülen anidakang aser takok tashi takaratiba nung vaccine agiang," ta pai ashi.

Maharashtra nunga district aika nung Covid-19 tensa tajungba küma aoba sülen tesem aika nung tenokdangba agütsür alibatem salatsütyonga aotsü sangdongogo. State sorkari Hombarnü nungi tenzükba Palghar nung restaurant, shopping mall aser cinema tem nung nüburtem shilem 50 anioktsü temelaba agütsüogo. Pune nungbo June 11 nü nungi temelaba agüjatokogo.

Gandhi-isa, nisung ajaki Covid-19 nungi jenboa alitsü atema tetuyuba agütsür aliba sülen manidakra lisopur ajak kümzükba mali, ta ashi.

(Maneni tapak 9 nung...)



Jammu nung shishilembadak ghonda ishika lapoktsüba mapang Narwal shishilembadak nüburtem nongtepba noksa nung angur.

Somali army camp nung suicide bomb pokloktsü

Mogadishu, Aami/June 15

(Agencies): Somalia yimtiba, Mogadishu nung aliba military training camp ka nung takum bendanga agütsü bomb poklokja sepaia tajemba agi 15 asü.

Army officer Mohamed Adan-i ashiba agi, Mongulbarnü lendong nung bomb pokloktsüsang ya General Dhegobadan Military Camp kima nung sepaia tasentem ama nokdaka lia bomb ya apok.

"Iba lendong nung sepaia tasen 15 asüba ni züingdangogo, saka iba lendong nung asürtem ya tali akumtsü akok," ta Adan-i ashi.

Iba lendong nung yirur alirtem ya Mogadishu nung aliba Madina Hospital-i anir ao, ta osang ajanga ashi.

Ita 18 tsüingta Somalia yimtiba nung lendong tesashitiba agütsüba atema telok katia tenüing agia mali, saka taoba mapanga telungpur telok, al-Shabab ajanga Somalia nung iba ama lendong ya agüja arua lir.

Somalia nung hotel aser security chencpoing tem nung

tetu lendong agütsür.

2019 küm December ita Mogadishu yimti tiyong nung aliba checkpoint ka nung takum bendanga agütsür bomb pokloktsür ka gari nung arua bomb pokloktsüba lendong nung nisung 81 asü, aser 2020 küm August ita hotel ka amakba nunga nisung 11 takum sama.

2011 küm Mogadishu nungi al-Shabab telungpur atsüingdokba sülen Somalia aser danga linük nungi teyari agütsüba sepaitemi item telok kübok taoba mapang aliba tesemtem nung military operation tesashiba agia arur.

Ajisüaaka al-Shabab telok yagi tang tashi Somalia south aser central tsütsü tesem kar amokbanga yimsü asür aser maneni Mogadishu aser danga tesemtem nung lendong agütsür.

Tesüiba küm 30 shi Somalia nung timtem balala ajurua arur, kong civil war, kin balala tsüingta rara, sorkar anema nok-o-nü bener nokdakba, ayawara aser yimtenren tashi maitba ajangshia lir.

July 19 tashi UK mokdanga ayutsü : PM Johnson

London, Aami/June 15

(Agencies): UK Ato Kilonser Boris Johnson-i, linük mokdanga aliba ano hopta pezü atsülangshiba metetdaksüogo. Linük mokdanga aliba ya shilem balala kuma lemsar salatsüyonga arudar aser June 21 nü tenokdangbatem salatsütsü asoshi lateter liasü, ajisüaaka Ato Kilonser-i ashiba agi, coronavirus Delta variant pokteter aliba ajanga tashidak menar aser mozüki nung temang anepalurtem ano aika lir, koba teblemtsü ka kümogo.

Linük mokdanga aliba salatsüyonga arur tatembangbuba jenjang agitsü lia tang July 19 tashi maneni atsülangshitsü asoshi telemtetba agiogo, kechiyong tashidak Delta variant menar aika kuma odar. Mongintemi, taruba hopta ishika tsüingda tashidak menar alir aika mozüki dang temang anepalutsüsa akümtsü ta tsüba bilemer.

"Mapa tatsüka atatsü nüngdaker," ta Johnson-i ashi.

Paisa, July 19 nü linük nung tenokdangba balala agütsür aliba ajunga salatsütsü aser iba sülen linük mokdanga ayutsü nüngdak madoktsü ta bilemer.

"Arishi küm 40 temapurtem ajak nem takokba tashi tekümzüka agütsütsü asoshi vaccine tanabuba dose agütsüba inyakyim takaratiba nung inyakyonga aotsü, koba onoki arishi küm 50 pur tema daka inyakogo," ta pai vaccine agütsüba sentong takaratiba nung inyakyonga aotsü sentong yanglur aliba indang jembidang ashi.

Johnson-isa, linük ajunga ano ita ka talila mokdanga ayutsü atema telemtetba agiba ya National Health Service (NHS) nem mapa talila agütsütsü asoshi lir, kechiyong Delta variant pokteter aliba ya teblemtsü ka kümogo, ta ashi. Tashidak tapu tasenba poktetba ajanga linük nung wara agi kanga mejungi kongshir aliba tesemtem nung tashidak menar anasü agi timba kuma odar.



Young Journalists Club ajanga sayaba noksa ka nung June 18 nü Iran tir atema tokteper Alireza Zakani (abelen), Mohsen Mehrizadeh (abelen nungi tanabuba), Saeed Jalili (tiyong), Abdolnasser Hemmati (achichilen nungi tanabuba) aser Ebrahim Raisi nungertem Tehran, Iran nung aliba sorkar meyong TV studio nung o intepba sentong tembanger aoba angur. Iba tir election nung Raisi-i takok angutsü amai lir, shiba mapang talangka nungi Supreme Leader Ayatollah Ali Khamenei sülen anidaka arur.

Afghanistan nung polio mapa inyaker nisung pezü tepset

Jalalabad, Aami/June 15

(Agencies): Afghanistan anüdoklen Jalalabad yimti nung azüdokshi lendong ataloka polio mozü agütsür nisung pezü yepset aser asem yirutsü, ta provincial health department ketdangsürtemi ashi.

Taoba küm Doha nung Taliban aser Afghan sorkar tsüingta yimjung ken o jembi tenzüka sülen urban centre tem nung inyaker tepsetba tali kumogo, kong sorkar mapa inyaker, health worker, media aser civil society züingsemtem aika dak tenük yoker lendong agütsür.

Nangarhar nung polio immunization drive tekolakba, Dr Jan Mohammad-i Mongulbarnü ashiba agi, Nangarhar nung yimti tulutiba, Jalalabad nung prangbong bena alirtemi tesem asem nung polio agütsür dak tenük yoker amakba mapang nisung pezü

tepsset aser asem yirutsü.

"Ita asem lir tanü ya onok operation tenzüker anogo anabuba liasü, saka onoki ano anena atatsüsa akumer," ta Mohammad-i osangbener dang ashi aser asür ajak ya tebur dang liasü, ta metetdaksü.

Taküm March ita Jalalabad nung telungpur temi polio mozü agütsür tetsü asem tepseta liasü, aser iba yongji health worker temi par mapa anena atatsüsa akum.

Alima nung polio tashidak kanga bulua anguba linük anaji Afghanistan aser Pakistan dang lir.

Mongulbarnü lendong ya telok katia tenüing agia mali.

Taliban telok, shirnoki bendangeri yariba Afghan sorkar atsüingdoktsü meranger, parnoki tawa lendong agütsüba nung shilem agia mali, ta shia arur.

Linük nung civil society,

osangbener aser ozüing meteter dak tenük yoker lendong agütsüba atema ISIL (ISIS) telokia tenüing agia arur.

Iba lendong atalokba police temi bushisüingdangba mapang lir, ta Nangarhar indang governor Zia ul Haq Amarkhil-i ashi.

Afghanistan nung aikati mozü agütsüba maparen anema nokdaker, kong telungpur temi mapang shia health worker dak lendong agütsür aser parnok ya anüolen linüktemi itdangiter yokba lir, ta ashi.

Afghanistan nungi US aser NATO sepaitem anizüker aoba maparen tatem kati aruba mapang azüdokshi tali akumer.

US sepaia 2,500 nungi 3,500 aser NATO-allied sepaia 7,000 shi September 11 tashinung Afghanistan yutsür aotsü sentong lir, ajisüaaka parnok ya July ita tom tashinung omar alitsü, ta takzür.

China nungertayimtsütem Taiwan litsü adena ait: Defence Ministry

Taipei, Aami/June 15

(Agencies): Mongolbarnü China nungertayimtsü 28 Taiwan indang air defence identification zone (ADIZ)-i aitba Taiwan sorkar sangdong ka ajanga metetdaksüogo. Tayimtsütem rongnung fighters aser nuclear-capable bomber tem densema liasü.

Iba osang dak sendakba nung Beijing-i telangzüba kecha magütsü, ajisüaaka linük tenet nungi lenirtemi Deobarnü ken o balala dak ajemdaker China artsüba den Taiwan Strait yimjung nung toktsütsü koda tongtiban,g iba indang lemsatepba sülen Mongolbarnü iba ya atalokogo.

China sorkari, taoba ita ishika Taiwan-i China nungertayimtsütem parnok litsü adena aitba indang ashishia arudar, ajisüaaka parnok tayimtsütem Taiwan kübok aliba Pratas asetkong anasa parnok indang air defence zone nung dang inyaksangshir, ta ashi.

Mongolbarnü China-i yokba tayimtsütem rongnung J-16 tayimtsü 14, J-11 fighters 6 aser H-6 bombers pezü densema lir. H-6 bomber nung nuclear weapon aser anti-submarine, electronic warfare aser early warning aircraft tem benteter, ta Taiwan Defence Ministry-i ashi.

Defence Ministry-i taoba küm nungi Taiwan indang ADIZ

nung China nungertayimtsütem inyaksangshi asadang tenzüka sülen Mongolbarnü tayimtsü timba yokba jangjaogo koba tang tashi nung April 12 nü China nungertayimtsü 25 Taiwan litsüi aitba ya timba laisü.

Ministry-isa, China nungertayimtsütem kümdangshidaktsütsü atema Taiwan air force indang combat aircraft tem yokba den item tayimtsütem asadanga alitsü atema missile system dena yoka liasü, ta ashi.

China nungertayimtsütem Pratas asetkong anasa yimzüba dang masü saka bomber aser fighter kar Taiwan south lena yimzüa liasü.

China-i, linük sovereignty wazüka ayutsü atema iba amala mesükba inyakyim ya benoka inyaksangshitsü nüngdaker ta shiogo.

China-i, Taiwan ya parnok litsü dak sendakba nung ken o tongtibanagiba ka lir aser United States-i mejushitsüla ta shia arudar.



Colombo anasa MV X-Press Pearl khu abenba rong nung mi adoka rongsaba sülen Sri Lanka tzüyim sepaitem Kapungoda tzükum nung plastic jana tem bendenba mapang tangokba noksa ka yangi angur.

ACKNOWLEDGEMENT

Onok pelaba, mulong alemba aser ozü sentsü; o agí ashítsü mabensar. Pa alima nung takum alidang kum aika takok tashi lenmang balala nung shirnokisa yaria aruogo, nenoknem ozüi kecha meyipa agütsütsü makoker, saka asen teyanglur Tsüngrem dang nenok asoshi teti temoastsü meshítsüa maneni sarasademtsür.

Au, ni tashü akhüm ayonghüm ajanga jajaaka, Ni kecha lendang metstütsür, kechiaser Na kü den lir, Ne mechi aser ajok agi ne sünepdaktür.

- *Tenüngsang Ken 23:4*

LT. IMKUMMEREN IMCHEN
20.10.1978 - 04.06.2021

Special thanks & gratitude to;

Dr. Sanjiv Jasuja (Apollo Hospitals, New Delhi)
Dr. Manong Konyak (Zion Hospital)
Dr. Vito Wotsa (Nikos Hospital)
Zion Hospital Nurses & Dialysis unit
Nikos Hospital Nurses & Dialysis unit
Referral Hospital Doctors & Nurses
Ao Senso Telongjem Dimapur
Dimapur Mangm etong Senso Telongjem
Dimapur Kangtsü Senso Union
Dimapur Ao Baptist Arogo
Signal Choir (DABA)
Kangtsüng Yimsen Arogo
Reyongsanger Putu Menden, Kangtsüng
Mangm etongtsür Telongjem Dimapur
Photography Club, Dimapur
All Stars Class of 2003, Patkai Christian College
Neighbours, Friends, Relatives, Cousins & Well-wishers

~ Temeim Kinungtsü, Tsürabur, Adianu aser Kinünger



Mulungnen O

Onoki teti meima aliba Ojala Imkonglemla (Mongsenyimti), shirangba mapang nungi la alima nungi pila aoba mapang tashi nung shirnokisa nübu, rongsen aser sarasadem agi yariogo, nenok ajak dangi tsüngdong mesüaka iba sabang ajanga tepela lemsateper.

Tongtipangsa;

1. Kohima aser Dimapur alir tembartem shirnokisa tsürabur mang tasoli tashi mina aruogo, ajak dang pelar.
2. Oking Hospital Kohima nung Doctor aser Nurse ajaki tajungtiba nung anepaluba asoshi pelar.
3. Mongsenyimti yimden aser Task Force Committee ajanga süngkum nung ozüng tesashi liaka yimli tulu sayuba asoshi pelaba shisemer.

~ Temeim Kinungbo, Chirnur aser Semchirtem.



ASO : 12th Nov' 1944
ASÜ : 09th June 2021

LGOU Dang Kanga Pelar

Longsa Gazetted Officers' Union (LGOU)-i nübur anema aliba tsütsü nungdakba ajiteta osettsüset tapu balala tenla agütsüba asoshi MCMC Longsa aser PHC Longsa ajanga kanga pelaba lemsateper.

- | | |
|---------------------------|----------------|
| (1) Inverter with battery | - 1 set |
| (2) Washing Machine | - 1 No. |
| (3) Oximeter | - 3 Nos |
| (4) Self Test Kit | - 25 Nos |
| (5) Wiring for Inverter | - Rs. 10,000/- |
| (6) Repair of Ambulance | - Rs. 20,000/- |
| (7) Stabilizer | - 2 Nos |

Tsüngremi LGOU maneni moajangma.

Sd/-
M.O, PHC Longsa

PELABA LEMSATEPER

ASÜ: 21/05/2021



Isaia 57:1-2

Temeshipur samar aser nisung shingaia temulungjang nung mayur, aser Tsüngrem tsübuha nisung bener oadoker, aser shingaia tarutsü tamajung nungi temeshipur bener aor ta meshisadanger. Pa tesünepdaki aier; parnok lep nung parnok anisüngzüker, Pa temeshi aser tindangba lemangi aor.

Lt. (Mrs.) **Tiainla Imchen** aser tenu Lt. (Mrs.) **Moasungla Imchen** shirangdang nungi akümlü tembangba anogo aser tanü tashi tembartem, kiyongertem, Arogo aser lokti tentet balala shirnokisa metitemi sarasadem, nübo aser rongsen agi yaria arudagi, kinungertem pelaba lemsateper. Onoki nenok senti mapa tajung asoshi tenüngsang agütsür aser nenok temeim mapa kodanga mamatsü.

Tena tsüngda temeim tesendaktep kecha den metemdangtsü makokba liasü aser kecha yonga melentsü makokba lir. Tena adianu liasü saka iba dak alaketta kati ka asoshi akang tembar liasü.

"A sister is a gift to the heart, a friend to the spirit, a golden thread to the meaning of life". Isadora James.

~ Temeim Tsürabur, Kinungbotem, chirnurtem, adianutem aser kinungertem.

Rahul Gandhi-i Covid-19 inyakyim... (Tapak 7 nungi...)

Kasa mapang nung Karnataka nunga June 14 nü nungi tenzüka June 21 nü tashi nung tenokdangbatem salatsüyonga aotsü. State sorkari e-commerce company tem nem oset ki tonga bener otsütsü atema temelaba agütsüogo. Lendi nung shishilembartem, ration dokan, yi ayokdak aser tanga shishilembadak kar lapoktsü temelaba agütsüogo. Tamil Nadu nung tenokdangba tem atsülangshija June 21 tashi state mokdanga ayutsü telemtetba agiogo, ajisiaka Hombarnü nungi tenzüka tenokdangba agütsür aliba aika salatsüogo. State kübok district 27 nung yi ayokdak lapoktsü temelaba agütsüogo aser industry tema inyaksangshitsü melaogo, saka mapa inyaker shilem 33 dang melar. Mongolnarnü India nung nisung 60,471 dak Covid-19 tashidak potetogo, koba anogo 75 tsüngda anogo ka nung nisung ishitiba dak tashidak potetba asütsü. Kasa mapang nung vaccine agir million 260 jungogo. India nung tang nisung 913,378 dak tashidak menar lir aser recovery rate 95.64% nung lir.

MCD lanurtemi azü tenla agütsü

Dimapur, Aami/June 15, 2021

(TYO): Hombarnü (14.06.2021) World Blood Donors anogomung nungtem nung, Muslim Council Dimapur kübok iba jila nung alir Muslim lanurtemi District Hospital indang Dimapur Blood Bank nung azü unit 35 tenla agütsüogo, ta sangdong ka ajanga Muslim Council Dimapur, president A.Rahman-i metetdaktü.

Tang ama Covid-19 tensa tamajungdang, Blood Bank nung shirangertem azü nungdakba asadantetogo aser Blood Bank nung azü agi mepiriba ajiteta, MCD-i blood donation camp ka ayongzüksü lemtet. Iba tenla ajanga nungdakba pur mesüra shirangertem yaritetsü akok.

Rongdak mapang, nijai azü tenlatsü asoshi MCD Shukriya volunteers (blood donors group)

ajanga maneni maparen achaayangtsü aser nungdak adokba mapang item p h . n o . (7 0 0 5 6 2 2 0 5 0 , 9856324874, 7005506019) nung tongtepratepang, ta pai ashi.

Red Cross mesüra tanga tentet kübok rongdak mapang, Muslim lanurtemi nija balala nem azü tenla agüja aruogo aser tang Camp ka ajanga MCD kübok Muslim lanurtemi azü tenla agütsüba inyakyim ya mezüng alitsü.

Iba Camp takok ngua agitetsü aser tang ama tensa tamajungdang timtemer tem aria bilemja azü tenlatsü asoshi longjemer inyakba atema, MCD-i lanurtem, molungsoa azü tenlar telok aser District Hospital indang Blood Bank dang pelaba metetdaktüogo, ta kasa sangdong nung shia lir.

Salim aser Javed indang documentary yanglutsü

Mumbai, Aami/June 15, 2021

(Agencies): Nungtugu writer ana - Salim Khan aser Javed Akhtar indang documentary ka par chirnur - star Salman Khan, actor Farhan Akhtar aser film yanglur Zoya Akhtar nungeri yanglutsü sentong lir. "Angry Young Men", ta nungja agütsüba documentary ya Namrata Rao-i direct asütsü. Movie talisa "Oye Lucky! Lucky Oye!", "Ishqiya", "Band Baaja Baaraat" aser "Kahaani" nung lai editor ama inyakba ajaki jangjaa lir.

Salim aser Javed indang documentary ya Salman Khan indang Salman Khan Films; Farhan Akhtar aser Ritesh Sidhwani na meyong Excel Entertainment; aser Zoya Akhtar aser Reema Kagti indang Tiger Baby Films sabang

ajanga produce asütsü.

"Iba project ajanga Salim aser Javed longjemer inyakba maparen sayutsü," ta sangdong ka ajanga metetdaktü.

1970s mapang, Salim aser Javed na longjemer "Zanjeer", "Sholay" aser "Deewar" atema shilem tulu agiba atema Indian cinema tsütsü temelenshi tulu adokdaktü aser tena maparen ajanga nübur aika atsüa aruogo. Tena film ajanga Bollywood blockbuster format tanaben yanglutsü maongka angu. India nung screenwriter rongnung Salim aser Javed nati mezüng star' jenang ajangzükteta lir.

Bollywood film 22 den külemi Kannada film ana nung külemi inyakba sülen, 1982 küm pei pei lenmangi aotsü tenati lemtet.

Sri Lanka series atema Rahul Dravid coach inyaksü: Jay Shah



BCCI Secretary, Jay Shah

New Delhi, Aami/June 15, 2021 (Agencies): Sri Lanka team den aruya aliba limited overs series atema, taoba mapang India captain Rahul Dravid-i India team coach ama inyaksü, ta Board of Control for Cricket in India (BCCI) Secretary, Jay Shah-i osang jangjatsüogo.

Shikhar Dhawan-i aniba team yagi Colombo kübok R Premadasa International Cricket Stadium nung ODIs aser T20Is asemsem asayatsü terenemba lir.

"Iba Sri Lanka series atema Rahul-i team coach inyaksü," ta BCCI Secretary-i ANI dang ashi.

Hombarnü India team

adenshiogo aser anogo tenet hard quarantine asütsü; iba sülen team pur anogo tenet soft quarantine den indoor training agi tenzüksü.

May 20, 2021 nü ANI sangdong ka ajanga angazükba agi, Ravi Shastri, Bharat Arun aser Vikram Rathour nunger Test team den külemi England nung lir asünung, iba series atema NCA head Dravid-i team coach inyaksü. 2014 küm England tour nung India tebur team atema batting consultant ka ama inyakba sülen, aruya aliba series nung Dravid tanaben India team den külemi inyaker alitsü.

India team June 28, 2021 nü Colombo-i aotsü aser July 4,

2021 nü quarantine' nung training agi metenzükdang, team pur anogo asem tashi hard quarantine asütsü. Iba sülen, July 13 nungi Colombo nung iba series asaya metenzükdang, team training agitsü asoshi melatsü.

Sri Lanka den limited-overs series atema renemshiba shilem ama, Colombo nung team-i intra-squad game asem asayatsü.

Iba white-ball squad nung adentsü asoshi Prithvi Shaw anisemogo. Opening batman talisa Devdutt Padikkal aser Rituraj Gaikwad naprongla squad nung denogo. Varun Chakravarthy, Kuldeep Yadav, Yuzvendra Chahal, Rahul Chahar aser K Gowtham nunger spin bowler ama asayatsü; kasa mapang Chetan Sakariya, shibai Indian Premier League (IPL) nung junga asayaogo, pa iba squad nung denogo.

India aser Sri Lanka tsüingda ODI series aser T20I series asemsem asayatsü atema taoba hopta osang tejangja sangokja liasü. Team ana tsüingda ODIs asem July 13, 16 aser 18 nü asayatsü. Iba sülen, T20I series ya July 21 nü mezüing asayatsü aser tanüingba match ana ya July 23 aser 25, 2021 nü asayatsü terenemba lir.

WTC Final nung Williamson asayatsü: Gary

Southampton, Aami/June 15, 2021 (Agencies): New Zealand aser India tsüingda World Test Championship (WTC) final asayaba mapang, Kane Williamson-i anir team asayatsü, ta June 18 nü nungi tenzüka asayatsü aliba marquee asayamung atema Mongolbarnü züingsem 15 squad sangdongba mapang, head coach Gary Stead-i iba osang metetdaksü.

Williamson tekatsü yiruba ajanga England aser New Zealand tsüingda tanabuba Test asayaba mapang, pai külem team pur den shilem magitet aser Tom Latham lenisüba kübok New Zealand team-i ayong ayonga wicket 8 agi tesemdanger team madak takok angu.

Wicketkeeper BJ Watling, shiba terbrem yiruba ajanga tanabuba Test masayatet, pa iba squad nung denogo.

"Kane aser BJ naprongla hopta ka anisüingzüka aser rehabilitation ajanga kanga dang ajanzükogo aser iba final (WTC) asaya atema tenaprong temang tejungtuba kümer shilem agitsü imla atar," ta WTC final atema team England tonga aruba sülen press conference ka nung Stead-i ashi.

"World Cup (WTC) final nung asayatsü maongka anguba ya alakteta maongka tajung lir aser Southampton nung team-i ano tajungtuba nung asayatsü

renemshidar," ta pai shisem. Stead-i ashiba agi, England akok yongjia, India team den asayatsü ya tayongzükba tulu ka asütsü.

"India team nung asayar tajung dang lir aser parnoki tongtumbang asayamung ajak nung temaba jenjang tongteta asaya aruogo. Ibayongji, onok atema parnok ya tetokteper team tajung ka asütsü," ta Stead-i ashi.

New Zealand team nung spin bowler takotet arishi küm 32 tain Ajaz Patel aser all-rounder Colin de Grandhomme dena asayatsü. Will Young ya team indang batman talila ama shimogo; kasa squad nung back-up wicketkeeper ama Tom Blundell aniokogo.

"Edgbaston nung Ajaz-i shilem tajung agiba asadanteta, team indang specialist spinner ama pa shimtsü lemetet aser Ageas Bowl nunga pai team atema tongti shilem agitsü amanger," ta Stead-i ashi.

"Küm aika atema Test asayamung nung Colin ya asayar tongtumbang ka ama asaya aruogo aser mapang talangka pa temang nung timtem ajanga masayateti arur sülen, Lord's nung tanaben külem team pur den asayatetsüsa mapang agi sempettsüba asoshi pelar. Temaba jenjang nung asayar tajung ka ama pa sempet ajanga sayuogo aser nungdakba mapang, bowling mesüra

batting tsütsü pai bendanga agütsür asayatsü imlar," ta Stead-i ashi.

New Zealand-i züingsem 20 squad nungi Doug Bracewell, Jacob Duffy, Daryl Mitchell, Rachin Ravindra aser Mitchell Santner densema nisung pungo agiogo.

"Asayar pungo tashi squad nungi ageinba ya temulung agi magizüker, kechiaser parnoki team atema kanga meranga asaya aruogo. Doug, Jacob aser Rachin nungeri parnok dak aketba sempet tajungtuba amshia team yariogo aser asaya mapang nunga par asem yagi kanga nungitogo.

"Squad nung asayartem tajemba kümtsür asünung, Heinrich aser team indang tanabuba physio Vijay Vallabh naprongla den Jacob, Rachin aser Mitchell nunger June 16, 2021 nü New Zealand-i apusoa aotsü. Tarutsü nung parnoki team atema maneni shilem tajung agitsü imla atar aser tanü tashi parnoki meranga asaya aruba atema pelaba lemsateper," ta Stead-i ashi.

WTC final atema New Zealand Squad nung Kane Williamson (c), Tom Blundell, Trent Boult, Devon Conway, Colin de Grandhomme, Matt Henry, Kyle Jamieson, Tom Latham, Henry Nicholls, Ajaz Patel, Tim Southee, Ross Taylor, Neil Wagner BJ Watling aser Will Young nunger dena lir.

Wimbledon final nung terepranger melatsü

London, Aami/June 15, 2021 (Agencies): Taküm indang tebur aser tetsür Wimbledon final asaya mapang, Centre Court nung terepranger melatsü, ta Hombarnü All England Club sangdong ka ajanga metetdaksü.

Taoba küm coronavirus wara ajanga terepranger medeni asayamung tem ayonga aruba sülen, United Kingdom kübok ayongtsü aliba Wimbledon nung terepranger melaba ya mezüing asayamung alitsü.

Hombarnü, British Ato Kilonser, Boris Johnson-i linük nung tatembangbuba lockdown tenokdangbatem salatsü asoshi July 19, 2021 tashi anogo atsülangtsü sangdong yongjia, iba asayamung final nung

terepranger melatsü lemtetogo. "June 28, 2021 (Hombarnü) nungi tenzüka asayatsü aliba Championships 2021 nung terepranger shilem 50 tashi melatsü aser Centre Court nung Final asayadang terepranger ajak (15,000) melatsü asoshi, sentong takok ngua yanglutetba atema Merton nung Sorkar, public health tentettem aser tekolakpurtem dang pelaba metetdaksür," ta All England Club-i ashi.

Alima ajunga asüingba COVID-19 wara tensa mejungi küma aoba ajanga, taoba küm Wimbledon asayamung thitemja liasü. Second World War mapang iba asayamung thitsür külen nungi taoba küm iba asayamung mezüing thitemja liasü.

Badminton asayar Markis Kido süogo



New Delhi, Aami/June 15, 2021 (Agencies): Indonesia nunger badminton asayar takotet aser Olympic doubles nung gold medal takok angusang, arishi küm 36 tain Markis Kido, pa temulung agi mapa meinyaki akümba sülen iba akümlü nungi pilaogo, ta social media sabang ajanga Badminton World Federation-i osang jangjatsüogo.

Markis Kido ya badminton tarep asayar tajung ka liasü aser 2008 Beijing Olympics nung pai külem asayar aser medemer tajung Henra Setiawan den longjemer gold medal takok angu.

2007 küm Kuala Lumpur nung ayongba World Championship tebur tarep nunga tenati takok nguogo. Kido aser Setiawan nati tarep asayar aser tenati mapang talangka tebur tarep asayamung amokbanga liasü. 2010 Asian Games asayamung nunga tenati gold medal takok ngua lir.

BWF aser Indonesian Badminton Association nati Markis asüba osang dak alaka tanga osang tejangja kecha memetetdaksü.

2018 küm ayongba Premier

Badminton League nung Markis Kido asayaogo. 2016 küm Hyderabad franchise tenung nungi asayaba mapang, pai India tsür Jwala Gutta den longjemer asayaogo.

Markis asüba osang angashia, Hombarnü India badminton star, Jwala-i social media sabang ajanga aoksaba osang lemsatepogo.

"MARKIS KIDO asüba osang angashia kanga dang aoksar. Iba osang mamangteter. Asayar tajung ka anojungi kanga kara oadok!," ta Jwala Gutta-i Markis den külemi asayaba noksa ka den iba olen lemsatep.

India nunger badminton asayar talisa HS Prannoy, Satiwiksairaj Rankireddy aser Ajay Jayaram nungeri Markis asüba osang angashia mangyim jashi lemsatepa liasü.

"Na asaya arudang temaba jenjang tongteta shilem agiba yimdangi arur. @PBLIndiaLive nung team ka nung nü den külemi asayatsü maongka anugba ya tia agi sempettsü ama bilemer. Asayar mongin ka anojungi oadokogo, Na tesünep nung anisüingzükanigma," ta

Satwik-i lemsatep.

BILEMDANGANG

"Karibo timtem mekokmin jenti liaka, ajak den pelaa litetter."